

大方便佛報恩經

名山題



多寶講寺敬印



大方便佛報恩經

若山題



佛尼牟迦釋師本無南



大方便報恩經品目（節選）

卷一 一—四八

序品第一 一

孝養品第二 二六

卷二 四九—九六

對治品第三 四九

發菩提心品第四 八五

卷三 九七—一四二

論義品第五 九七

大方便佛報恩經卷第一

失譯人名出後漢錄

序品第一

如是我聞。一時，佛住王舍城，耆闍崛山中，與大比丘衆，二萬八千人俱，皆所作已辦，梵行已立，不受後有，如摩訶那伽，心得自在。其名曰：摩訶迦葉、須菩提、憍陳如、離越多訶多、富樓那、彌多羅尼子、畢陵伽婆蹉、舍利弗、摩訶迦旃延、阿難、羅睺羅等，衆所知識。菩薩摩訶薩，三萬八千人俱。此諸菩薩，久植德本，於無量百千

萬億諸佛所，常修梵行，成滿大願。悉能通達百千禪定、陀羅尼門。不捨大悲，隨諸衆生而能饒益，紹隆三寶，使不斷絕。能建法幢，為諸衆生作不請友，到大智岸，名稱普聞。其名曰：觀世音菩薩、得大勢菩薩、常精進菩薩、妙德菩薩、妙音菩薩、電光菩薩、普平菩薩、德首菩薩、須彌王菩薩、香象菩薩、大香象菩薩、持勢菩薩、越三界菩薩、常悲菩薩、寶掌菩薩、至光英菩薩、焰熾妙菩薩、寶月菩薩、大力菩薩、無量慧菩薩、跋陀和菩薩、師子吼菩薩、師子作菩薩、師子奮迅菩薩、滿願菩薩、寶積菩

薩、彌勒菩薩、文殊師利法王子等，百千眷屬俱。復有無量百千欲界諸天子等，各與眷屬俱。賫諸天上微妙香華，作天伎樂，住虛空中。諸天、龍、夜叉、乾闥婆、阿脩羅、迦樓羅、緊那羅、摩睺羅伽、人、非人等，各與若干百千眷屬俱。各禮佛足，退坐一面。爾時如來，大衆圍繞，供養恭敬，尊重讚嘆。爾時，阿難承佛威神，於晨朝時，入王舍城，次第乞食。爾時，城中有一婆羅門子，孝養父母，其家哀喪，家計蕩盡，擔負老母，亦次第行乞。若得好食，香美果蓏，仰奉於母。若得惡食，萎菜乾果，而自

食之。阿難見之，心生歡喜，偈讚此人，善哉善哉。善男子，供養父母，奇特難及。有一梵志，是六師徒黨，其人聰辯，悉能通達四圍陀典，歷數算計，占相吉凶，陰陽爻變，豫知人心。亦是大衆唱導之師，多人瞻奉。執著邪論，為利養故，殘滅正法，心懷嫉妒，毀佛法衆。語阿難言，汝師瞿曇，諸釋種子，自言善好，有大功德，唯有空名，而無實行。汝師瞿曇，實是惡人。適生一七，其母命終，豈非惡人也。逾出宮城，父王苦惱，生狂痴心，迷悶躋地，以水灑面，七日方能醒悟，云何今日失我所天。舉

聲大哭，悲淚而言，國是汝有，吾唯有汝一子，云何捨我入於深山。汝師瞿曇，不知恩分，而不顧錄，遂前而去。是故當知，是不孝人。父王為立宮殿，納娶瞿夷，而不行婦人之禮，令其愁毒。是故當知，無恩分人。阿難聞是語已，心生慚愧。乞食得已，還詣佛所，頭面禮足，却住一面，合掌白佛言，世尊，佛法之中，頗有孝養父母不耶。佛語阿難，誰教汝令發是問。諸天神耶，人耶，非人耶。汝為自以智力問於如來耶。阿難言，亦無諸天龍鬼神，人及非人，來見教也。向者乞食，道逢六師徒黨，薩遮尼

乾子，見毀罵辱。阿難即以上事向如來說。爾時，世尊熙怡微笑，從其面門，放五色光，過於東方無量百千萬億佛土。彼有世界，名曰上勝，其佛號曰，喜王，如來、應供、正遍知、明行足、善逝、世間解、無上士、調御丈夫、天人師、佛、世尊。國名嚴盛，其土平正，琉璃為地，黃金為繩以界，道側七寶行樹，其樹皆高盡一箭道，華果枝葉，次第莊嚴。微風吹動，出微妙音，衆生樂聞，無有厭足。處處皆有流泉浴池，其池清淨，金沙布地，八功德水，盈滿其中。其池四邊，有妙香華，波頭摩華，分陀利

華，跋師迦華，青黃赤白，大如車輪，而覆其上。其池水中，異類諸鳥，相和而鳴，出微妙音，甚可愛樂。有七寶船，亦在其中，而諸衆生，自在遊戲。其樹林間，敷師子座，高一由旬，亦以七寶而校飾之，復以天衣重敷其上。燒天寶香，諸天寶華，遍布其地。喜王如來而坐其上，結跏趺坐。彼國菩薩，無量億千，前後圍繞，却坐一面。合掌恭敬，向於如來，異口同音俱發聲言，唯願世尊，慈哀憐愍，以何因緣，有此光明，青黃赤白，其色輝艷，難可得喻。從西方來，照此大衆，其有遇斯光者，心意泰然。

唯願世尊，斷我疑網。佛言，諸善男子，諦聽諦聽，善思念之，吾當為汝，分別解說。西方去此無量百千諸佛世界，有世界名娑婆。其中有佛，號曰釋迦牟尼，如來、應供、正遍知、明行足、善逝、世間解、無上士、調御丈夫、天人師、佛、世尊。大衆圍繞，今欲為諸大衆，說大方便大報恩經。為欲饒益一切諸衆生故。為欲拔出一切衆生邪疑毒箭故。為欲令初發意菩薩，堅固菩提不退轉故。為令一切聲聞、辟支佛，究竟一乘道故。為諸大菩薩速成菩提，報佛恩故。欲令一切衆生念重恩故。欲令衆生

越於苦海故。欲令衆生孝養父母故。以是因緣故，放斯光明。爾時，大衆中有十千菩薩，一一菩薩，皆是大衆唱導之師，即從座起，偏袒右肩，右膝著地。叉手合掌，而白佛言，唯願世尊，加威神力，令我等輩，得往娑婆世界，親近供養釋迦牟尼如來，並欲聽大方便佛報恩微妙經典。爾時，彼佛告諸菩薩言，善男子，汝往娑婆世界，若見彼佛，應生供養恭敬難遭之想。何以故，釋迦如來，於無量百千萬億阿僧祇劫，難行苦行，發大悲願，若我得成佛時，當於穢惡國土，山陵堆阜，瓦礫荊棘，其中衆

生，具足煩惱，五逆十惡，於中成佛，而利益之，使斷一切苦，獲一切樂，成就法身永盡無餘。其佛本願如是。汝等今往，當如佛往，住如佛住。諸菩薩衆俱發聲言，如世尊敕。一一菩薩，各將無量百千萬億諸菩薩衆，以為眷屬，前後圍繞，往詣娑婆世界。所經國土，六種震動，大光普照，虛空神天，雨曼陀羅華，摩訶曼陀羅華，放大光明，神足感動恒沙世界。復有無量百千萬種諸天伎樂，於虛空中，不鼓自鳴。是諸菩薩等，往詣耆闍崛山，到如來所，頭面禮足，繞佛三匝，却住一面。爾時，如來

復放一光，直照南方過八十萬億諸佛國土。有世界名曰光德，彼中有佛，號曰思惟相，如來、應供、正遍知、明行足、善逝、世間解、無上士、調御丈夫、天人師、佛、世尊。國名善淨，其土平正，琉璃為地，黃金為繩以界，道側七寶行樹，其樹皆高盡一箭道，華果枝葉，次第莊嚴。微風吹動，出微妙音，衆生樂聞，無有厭足。處處皆有流泉浴池，其池清淨，金沙布地，八功德水，盈滿其中。其池四邊有妙香華，波頭摩華，分陀利華，跋師迦華，青黃赤白，大如車輪，而覆其上。其池水中，異類諸鳥，相和悲

鳴，出微妙音，甚可愛樂。有七寶船，亦在其中，而諸衆生，自在遊戲。其樹林間，敷師子座，高一由旬，亦以七寶而校飾之，復以天衣重敷其上。燒天寶香，諸天寶華，遍布其地。思惟相如來而坐其上，結跏趺坐。彼國菩薩，無量億千，前後圍繞，却住一面。合掌向於如來，異口同音俱發聲言，唯願世尊，慈哀憐愍，以何因緣，有此光明，青黃赤白，其色輝艷，難可得喻。從北方來，照此大衆，其有遇斯光者，心意泰然。唯願世尊，斷我疑網。佛言，諸善男子，諦聽諦聽，善思念之，吾當為汝，分別解

說。北方去此無量百千諸佛世界，有世界號名娑婆。其
中有佛，號曰釋迦牟尼，如來、應供、正遍知、明行足、善
逝、世間解、無上士、調御丈夫、天人師、佛、世尊。大衆
圍繞，今欲為諸大衆，說大方便大報恩經。為欲饒益一
切諸衆生故。為欲拔出一切衆生邪疑毒箭故。為欲令初
發意菩薩，堅固菩提不退轉故。為令一切聲聞、辟支佛，
究竟一乘道故。為諸大菩薩速成菩提，報佛恩故。欲令
一切衆生念重恩故。欲令衆生越於苦海故。欲令衆生孝
養父母故。以是因緣故，放斯光明。爾時，大衆中有十千